

- विदेश मंत्री डॉ. एस जयशंकर होरें आखेआ ऐ जे इस बरे भारत दी अध्यक्षता च होने आहले ब्रिक्स शिखर सम्मेलन दुरान लचीलापन, नमियां काहडां, सहयोग ते स्थिरता प्रमुख प्राथमिकता होङन।
- सेना प्रमुख जनरल उपेंद्र द्विवेदी होरें आखेआ जे आपरेशन सिंदूर त्रों सेनाएं दे तालमेल दी सभनें थमां बेहतरीन मिसाल हा। उनें आखेआ जे पाकिस्तान दी कुसै बी नापाक हरकत दा असरदार ढंगै सिर परता दिता जाहगा।
- गृह मंत्री अमित शाह होरें आखेआ जे भारत अगले बरे दे अखीरै तगर त्रीऽ सभनें थमां बड्डी अर्थ बवस्था बनिए उभरोग।
- राश्ट्री जांच एजेंसी एनआईए नै बांग्लादेशी अवैध आप्रवासन रैकेट दी जांच अपने हत्थें च लेई लैती ऐ।
- ते इंडिया ओपन बैडमिंटन प्रतियोगिता अजै सोयां नमीं दिल्ली दे इंदिरा गांधी इंडोर स्टेडियम च शुरू होई।

<><><><><><>

EAM-BRICS

विदेश मंत्री डॉ. एस. जयशंकर होरें आखेआ ऐ जे इस बरे होने आहले ब्रिक्स शिखर सम्मेलन दी भारत दी अध्यक्षता दुरान लचीलापन, नमियां काहडां, सहयोग ते स्थिरता प्रमुख प्राथमिकता होंगन। ब्रिक्स शिखर सम्मेलन दे लोगो, थीम ते वेबसाइट दी शुरूआत दे मौके पर जयशंकर होरें आखेआ जे एह तरजीह आहले समूह दे त्रै बुनियादी थम्म राजनीतिक ते सुरक्षा, आर्थिक ते माली सांस्कृतिक ते जन समुदाय आदान-प्रदान आस्तै इक सुसंगत ढांचा प्रदान करोग। उनें आखेआ जे भारत शिखर सम्मेलन दुरान वैश्विक कल्याण आस्तै ब्रिक्स मुल्लें दी क्षमता गी इकजुट करने दा जतन करोग। जयशंकर होरें आखेआ जे ब्रिक्स इस बरे 20 बरे पूरे करा रदा ऐ, इस दुरान एह उभरदे बजारें ते विकासशील अर्थ बवस्थाएं बश्कार सहयोग दे इक महत्वपूर्ण मंच दे तौर पर लगातार विकसित होआ ऐ। उनें आखेआ जे नमियां काहडां वैश्विक आर्थिक विकास दा इक प्रमुख केंद्र बने दा ऐ ते सामाजिक आर्क चुनौतिएं कन्नै निब्वडने आस्तै नमीं ते उभरदी प्रौद्योगिकी दा लाह दोआना अत्त लाजमी ऐ। उनें आखेआ जे पिछले किश बरें च ब्रिक्स नै अपने एजेंडे ते सदस्यता दा विस्तार कीता ऐ। जयशंकर होरें आखेआ जे एह मंच बदलदी वैश्विक परिस्थितिएं दे मूजब कम्म करा'रदा ऐ।

<><><><><><>

Jitender G Ram G

कार्मिक, जन शकैतें ते पेंशन सरबन्धी राज्यमंत्री डॉ. जितेंद्र सिंह होरें आखेआ जे विकसित भारत जी राम जी कनून हर माली बरे च हर ग्रामीण परोअरा गी पैहले दे 100 दिन दी थाहर पर 125 दिन दी ध्याडी आहले रोजगार दी गरंटी दिंदा ऐ। नमीं दिल्ली च अज्ज विकसित भारत जी राम जी पर

संवाददाता सम्मेलन गी संबोधित करदे होई सिंह होरें आखेआ जे एह योजना रड ते बाड़ी दे मौसम दरान राईबाई, मजदूरें दी उपलब्धता यकीनी करने आस्तै कुल 60 दिनें दी विजन कम्म दी अवधि बी प्रदान करदी ऐ। उनें आखेआ जे एह कनून बक्ख-बक्ख सार्वजनिक कम्में दा इक संगम ऐ। एहदे च मुख तौरा पर जल सुरक्षा ते ग्रामीण बुनियादी ढांचे पर ध्यान केंद्रित कीता गेआ ऐ।

<><><><><><>

Army Chief Op. Sindoor

सेना प्रमुख जनरल उपेंद्र द्विवेदी होरें आखेआ ऐ जे आपरेशन सिंदूर त्रोंणें सेनाएं दे तालमेल दी सभनें थमां बेहतरीन मिसाल हा। एहदे च कार्रवाई करने ते जवाब देने दी पूरी आजादी ही। उनें आखेआ जे एह आपरेशन अजें बी जारी ऐ ते दुश्मन दी कुसै बी नापाक हरकत दा असरदार ढंगै सिर परता दित्ता जाहगा। नमी दिल्ली च इक संवाददाता सम्मेलन गी संबोधित करदे होई सेना प्रमुख जनरल उपेंद्र द्विवेदी होरें आखेआ जे पहलगाम आतंकवादी हमला करने, आतंकवा ढांचे गी खत्म करने ते लम्मे चिरें थमां चली आवा'रदी परमाणु हमले आली बयानबाजी गी खत्म करने च रणनीतिक सोच गी बदली दित्ता। सेना प्रमुख होरें आखेआ जे सशस्त्र बलें 9 चा 7 लक्ष्यें गी सफलतापूर्वक तबाह कीता ते पाकिस्तान दी कार्रवाई दा बनकदा परता यकीनी कीता। जनरल द्विवेदी होरें आखेआ जे 10 मई थमां पच्छमी मोर्चे ते जम्मू-कश्मीर च स्थिति संवेदनशील बनी दी ऐ पर पूरी चाल्लद कन्नै काबू च ऐ। उनें दस्सेआ जे पिछले बरे 31 आतंकवादिएं दा सफाया कीता गेआ ते इन्दे चा ज्यादातर पाकिस्तानी हे। सेना प्रमुख हारें एह बी आखेआ जे उत्तरी मोर्चे पर हालात स्थिर न पर फही बी लगातार निगरानी कीती जा'रदी ऐ।

<><><><><><>

DM-Medical Camp

रक्षा मंत्री राजनाथ सिंह होरें अज्ज वीडियो कांफ्रेंस राएं लक्ष्यद्वीप च बहु स्तरीय सांझे सेना सेवा मेडिकल कैंप दा उद्घाटन कीता। उनें इस सरबन्धी समारोह गी संबोधित बी कीता। इस मौके पर उनें आखेआ जे भारती नौसेना आसेआ आयोजित एह शिविर दूर-दराज दे इलाकें च नागरिकें आस्तै बेहतर सेवा प्रदान करने दी सरकार दी बचनबद्धता गी दर्शादा ऐ। रक्षा मंत्री होरें आखेआ जे व्यापक स्क्रीनिंग, शुरुआती जांच, समेंसिर सलाह ते मुफ्त दवाईएं दी बंड लम्मे चिरै तगर सेहत सरबन्धी लाह च योगदान करोग।

<><><><><><>

Budget Session

केन्द्रीय बजट 2026-27 अगले महीने दी पैहली तरीख गी लोकसभा च पेश कीता जाग। संसद दा बजट सत्र इस महीने दी 28 तरीक थवां शुरु होइयै 2 अप्रैल तगर चलोग। संसद दे बजट सत्र दी शुरुआत 28 जनवरी गी राष्ट्रप्रति द्रौपदी मुरमू हुंदे आसेया संसद दी सांझी बैठक च अभिभाषण कन्नै होग। बजट सत्र दा पैहला गेड 28 जनवरी थवां 13 फरवरी तगर ते दुआ गेड 9 मार्च थवां 2 अप्रैल तगर चलोग। सत्र दे दौरान कुल 30 बैठकां होगन।

<><><><><><>

जम्मू-कश्मीर विधानसभा दा बजट सत्र 2 फरवरी थवां शुरु होग। विधानसभा दा एह 5मां सत्र होग। सत्र दी शुरुआत उपराज्यपाल हुंदे सम्बोधन कन्नै होग। इसदे मगरा 3 फरवरी थवां 5 फरवरी तगर उपराज्यपाल हुंदे सम्बोधन पर धन्नवाद प्रस्ताव पर चर्चा होग ते एदा समापन चर्चा दे जवाब कन्नै होग। 6 फरवरी गी सरकार बजट पेश करोग ते 10 फरवरी तगर इसदे पर चर्चा होग। मुख्यमंत्री उमर अब्दुल्ला जिंदे कश खजाना मैहकमे दा कम्मकाज बी ऐ ओह अपनी इस सरकार दा दुई बारी बजट पेश करगंन। 19 फरवरी तगर विधानसभा च अनुदान मंगे पर चर्चा होग। मगरा छुट्टियां रौहगंन। सत्र मार्च च परतियै शुरु होग ते अप्रैल 4 तगर जारी रहोग। बजट सत्र च कुल 22 बैठकां होगंन।

<><><><><><>

VP Viksit Bharat

उपराष्ट्रपति सी.पी राधाकृष्णन होरें आखेआ ऐ जे विकसित भारत दा सुखना उसलै गै साकार होई सकदा ऐ, जिसलै मुख्य दे युवा नशामुक्त, सेहतमंद ते अपने मकसद प्रति समर्पित होन। ओह अज्ज राश्ट्री राजधानी च दिल्ली विश्वविद्यालय दे नशामुक्त परिसर अभियान गी संबोधत करा'रदे हे। उपराष्ट्रपति होरें आखेआ जे एह कार्यक्रम सरकार दे नशामुक्त भारत अभियान दे मुजब ऐ। उनें आखेआ जे नशीले पदार्थें दा सेवन इक सामाजिक चुनौती, सार्वजनिक सेहत दी चिंता दा विशे ते मुख्य दे जनसांख्यिकीय लाहू आस्तै खतरा ऐ। राधाकृष्णन होरें आखेआ जे मौजूदा समें च सारे मादक पदार्थें सोयां दूर रौहना बड़ा मता जरूरी ऐ। उनें नशीले पदार्थें खलाफ अवाज चुककने ते एहदे इस्तेमाल प्रति जारूकता फैलाने दी जरूरत पर बी जोर दित्ता।

<><><><><><>

HM Development Projects

गृह मंत्री सहकारिता मंत्री अमित शाह होरें आखेआ जे मुख्य अगले ब'रे दे खीरै तगर त्री सभनें थमां बड़ी अर्थ बवस्था बनिए उभरोग। उनें गांधी नगर जिले दे अपने गृह नगर मानसा च 267 करोड़ रपे थमां मती दी विकास परियोजनाएं दी शुरुआत कीती ते केइएं दा नीहू पत्थर रखने मगरा इक जनसभा गी बी उनें संबोधित कीता। शाह होरें आखेआ जे सरकार 2047 तगर भारत गी हर क्षेत्र च वैश्विक अगुवाह बनने आस्तै प्रतिबद्ध ऐ। इस मौके पर उनें सोमनाथ मंदर गी मुख्य दी पंछान ते आत्म सम्मान दा प्रतीक दस्सेआ। उनें आखेआ जे सरकार मंदर दे जहार ब'रे पराने गौरवशाली इतिहास गी प्रदर्शित करने ते आत्मसम्मान दी इस विरासत गी औने आहली पीढ़िए तगर पजाने आस्तै पूरे ब'रे सोमनाथ स्वाभिमान पर्व मनाग। शाह होरें आखेआ जे अहमदाबाद खेडें आस्तै इक नमें वैश्विक केंद्र दे तौर पर उभरा'रदा ऐ ते शैहर च 2036 दे ओलंपिक खेडें दी मेजबानी आस्तै जत्त जारी न। उनें मुकामी खडारिएं थमां मानसा च नमें तयार खेड परिसर दा पूरा लाहू ठोआने दा आग्रह कीता।

<><><><><><>

Incentives e-Vehicles

सरकार नै उत्पादन लिंकड इन्सेंटिव पी.एल.आई आटो योजना दे तैहत हुनै तगर 13 लक्ख 61 जहार थमां मती इलेक्ट्रिक गड्डिएं गी प्रोत्साहन दित्ता ऐ। भारी उद्योग मंत्रालय नै दस्सेआ जे इस योजना तैहत इलेक्ट्रिक गड्डी ते हाईड्रोजन फ्यूल सेल घटकें पर 13 थमां 18 फीसद ते होर दुए उन्नत ऑटोमोटिव प्रौद्योगिकी घटकें पर 8 थमां 13 फीसद तगर प्रोत्साहन दित्ता जंदा ऐ। मंत्रालय नै दस्सेआ ऐ जे 10 लक्ख थमां मते इलेक्ट्रिक दो पहिया वाहनें, 2 लक्ख थमां मते आटो रिक्खा, करीब 80 जहार चार पहिया गड्डिएं ते करीब 1400 इलेक्ट्रिक बसें गी प्रोत्साहन दित्ता गेआ ऐ।

<><><><><><>

Health-Care Transformation

सेहत सुविधाएं सरबंघत ढांचागत विकास, मेडिकल शिक्षा च बेहतर बाढ़े ते भारत सरकार थमां लगातार सहयोग करिए जम्मू-कश्मीर च सेहत सहूलतें च ऐतिहासिक ते दूर तोड़ी पुज्ज बनाने आला बदलाव आवा'रदा ऐ। पिछले किश ब'रें च सेहत ते परोआर कल्याण मंत्रालय बक्खिया रणनीतिक ढंगै निवेश करने करी पूरे जम्मू-कश्मीर च शहर दे कन्नो-कन्नी ग्राएं थाहें तोड़ी बी बेहतर सेहत सुविधां पजाइयां जा'रदियां नै इस अहम बदलाव च दो एम्स, 12 मेडिकल कालेज, 17 क्रिटिकल केयर इदारे ते 3 जहार 166 वेलनस सेंटर दी स्थापना इक मील दे पत्थर आह्ला लेखा ऐ।

<><><><><><>

NIA-Bangladeshi

राश्ट्री जांच एजेंसी-एन.आई.ए नै बांग्लादेशी अवैध आप्रवासन रैकेट दी जांच अपने हत्थै च लेई लैती ऐ। एहदे थमां पैहले दिल्ली पुलिस दी विशेष इकाई इस मामले दी जांच करा'रदी ही। अधिकारिएं दस्सेआ जे एनआईए नै पिछले हफ्ते औपचारिक तौर पर मामले दी जिम्मेदारी लैने मगरा नमीं एफ.आई.आर दर्ज कीती। एहू कार्रवाई गृह मंत्रालय दे निर्देश मगरा कीती गेई ऐ ते एजेंसी नै अपनी जांच शुरू करी दित्ती ऐ। एहू मामला शुरूआत च दिल्ली पुलिस आसेआ राजधानी च अवैध आप्रवासन खलाफ चलाए गेदे व्यापक अभियान दरान दर्ज कीता गेआ हा। पुलिस दी जांच मुख्य च प्रवेश करने दे अवैध रस्ते, जाली पंछान दस्तावेजें, आवास प्रदाताएं ते विजन दस्तावेज आहले आप्रवासिएं गी रोजगार दोआने आहले एजेंटें पर केंद्रित ही।

<><><><><><>

Parade Passes

रक्षा मंत्रालय नै कर्तव्य पथ पर “गणतंत्र दिवस-2026” दी फुल ड्रेस रिहर्सल परेड लेई मुफ्त पास जारी करने दी घोषणा कीती ऐ। एहू पास 15 ते 16 जनवरी गी मुफ्त बुकिंग लेई उपलब्ध रोहगंन। पास बुक करने दी इच्छेया रखने आहले लोक www.aamantran.mod.gov.in वेबसाईट या आमंत्रण मोबाईल ऐप पर- पास बुक कराई सकदे न। इस बारे गणतंत्र दिवस दी फुल ड्रेस रिहर्सल परेड 23 जनवरी गी आयोजित कीती जाहगा।

<><><><><><>

Lohri

उत्तर-भारत दे बड़े लोक पर्व इचा इक “लौहड़ी” दा त्योहार अज्ज पंजाब- जम्मू-कश्मीर- दिल्ली ते हरियाणा च मते उत्साह कन्नै मनाया जा रदा ऐ। मनाया जा रदा ऐ। ऐसी मान्यता ऐ जे सुर्ज एदे मगरा उतरायण होई जन्दा ऐ। लोक अज्ज दे दिन संजा लै लौहड़ी बालदे न- उस्सी अर्ध देइयै मत्था टेकदे न। बच्चें अज्ज दे दिन छज्जे लेइयै- हिरण ते होर भांती-भांती दे दा वेश धारियै ते रिवायती गीत गाइयै लौहड़ी मंगदे न। लोक इक-दुए गी लौहड़ी दियां मुबारकां दिंदे न ते मुंगफली-गजक-मेवे-रेओड़ियां बंडदे न। राष्ट्रपति द्रौपदी मुरमू ते प्रधानमंत्री नरेन्द्र मोदी हुंदे इलावा केई सियासी-समाजी ते धार्मिक लीडरें लोकें गी “लौहड़ी” दियां शुभकामनां दितियां न। उनें आखेया जे एह त्योहार आपसी भाईचारा- सौहार्द ते इक-दुए प्रति इज्जत ते खुशियां लेइयै औन्दा ऐ।

<><><><><><>

Vaishnav Minerals Meeting

केंद्री मंत्री अश्विनी वैश्वणव होरें बेहद जरूरी खनिजें सरबन्धी मंत्रिण दी बैठक च शिरकत कीती जेदी मेजबानी संयुक्त राष्ट्र दे खजाना मंत्री स्काट बेसेंट होरें वाशिंगटन डी.सी च अज्ज कीती। बैठक च महत्वपूर्ण खनिजें खासकरी दुर्लभ खनिजें आस्तै वैश्विक सतर पर आपूर्ति ढांचे गी मजबूत करने पर जोर दित्ता गेआ। इस मौके वैश्वणव होरें आखेआ जे एह भारत जनेय देश आस्तै बेहद जरूरी ऐ जित्थे उत्पादन खासकरिए इलेक्ट्रानिक्स तेजी कन्नै विकास करा’रदा ऐ।

<><><><><><>

India Open Badminton

India Open Badminton प्रतियोगिता अज्जै सांयो नमीं दिल्ली दे इंदिरा गांधी इंडोर स्टेडियम च शुरू होई। मौजूदा समें च 18मीं रैंक पर काबिज पी.वी सिंधू इ प्रतियोगिता च भारत दी अगुवाई करा करदियां न। मालविका बंसोड ते तन्वी शर्मा बी महिला सिंगल्स च अपनी चनौती पेश करंगन। महिला डबल्स च त्रिशा जॉली ते गायत्री गोपीचंद हिस्सा लै’रदियां न। मर्दे दे एकल च लक्ष्य सेन ते आयुश शेटी पैहले दौर च आमने-सामने होडन।

<><><><><><>

Healy-Retirement

आस्ट्रेलियाई महिला क्रिकेट टीम दी कप्तान एलिसा हिली नै 2026 दे 20-20 विश्व कप थमां पैहले अंतरराष्ट्री क्रिकेट दे सारे प्रारूपें थमां सन्यास दी घोशणा कीती ऐ। 35 बरे दी हिली नै इक पाडकास्ट च दस्सेआ जे उनें सन्यास दा फैसला केई बारी लग्गी दी सट्ट ते मानसिक थकान करी लैता ऐ। हिली नै आखेआ जे ओह फरवरी मार्च च भारत कन्नै होने आली घरेलू श्रृंखला च खीरी मैच खेडन।

<><><><><><>

Weather

मौसम विाग नै अज्ज राजस्थान च घनी शा मती घनी धुंध दा रेड अलर्ट जारी कीता ऐ। मैहकमे नै हिमाचल प्रदेश ते उत्तर प्रदेश च बी घनी धुंध दा रेड अलर्ट जारी कीता ऐ। अगले दो-त्रै दिनें दरान जम्मू-कश्मीर, लद्दाख, हिमाचल प्रदेश, उत्तराखंड, पंजाब, चंडीगढ़, हरियाणा, राजस्थान, दिल्ली, बिहार, पच्छिम बंगाल च हिमालय दे तराई क्षेत्रें ते सिक्किम घनी धुंध छाए दे रौने दी पेशगोई कीती ऐ।

<><><><><><>

Trump-Iran

अमरीका दे राष्ट्रपति डॉनल्ड ट्रम्प होरें घोशणा कीती ऐ जे ईरान दे कन्नै कारोबार जारी रखने आहले मुखें गी अमरीका कन्नै अपने बवसाय पर 25 फीसद दा शुल्क देना होग। एहू गैंऽ मुख भरै च सरकार बरोधी प्रदर्शनें पर होई दी जानलेवा कार्रवाई मगरा अमरीका आसेआ दवा बदाने दे मगरा पुट्टी गेई ऐ। अपने सोशल मीडिया पोस्ट च ट्रम्प होरें आखेआ जे एहू फैसला फौरी तौर पर लागू होग। उनें इसी खीरी फैसला दस्सेआ ऐ। एहू गैंऽ ईरान पर पैहले सोयां लगगे दे अमरीका दे प्रतिबंधें गी होर बदांदा ऐ। ईरान पैहले थवां गै बददी महंगाई ते तेजी कन्नै कमजोर हुंदी अपनी मुद्रा कन्नै दो-चार होआ'रदा ऐ। इस करी खाने-पीने आहली चीजें दियां कीमतां 70 फीसद तगर बदी गेइयां न। चीन ईरान दा सभनें थमां बड्डा बपारिक सांझेदार ऐ ओहदे मगरा ईराक, संयुक्त अरब अमीरात, तुर्की ते भारत ऐ।

<><><><><><>

LG-Employee Sack

आतंकवाद तंत्र खिलाफ बड्डी कार्रवाई करदे होई उपराज्यपाल मनोज सिन्हा होरें प्रतिबंधित आतंकवादी संगठनें कन्नै ताल्लुक होने करी 5 सरकारी कर्मचारिएं गी नौकरी थमां हटाई दित्ता ऐ। आकाशवाणी जम्मू संवाददाता नै जानकारी दित्ती ऐ जे बर्खास्त कर्मचारिएं च इक सरकारी शिक्षक मोहम्मद इश्फाक, इक लैब टेकनिशियन तारीक अहमद राह, इक सहायक लाइनमैन बशीर अहमद मीर ते जंगलात मैहकमे च चौथी श्रेणी दा कर्मचारी फारूक अहमद भट्ट ते सेहत मेडिकल शिक्षा विभाग च इक डरैवर मोहम्मद युसुफ शामिल न।

<><><><><><>

SC-Stray Dogs

सुप्रीम कोर्ट नै अज्ज लोकें ते संगठनें गी पुच्छेआ ऐ जे मानवता सिर्फ जानवरें तोड़ी सीमित ऐ ते मनुक्खें तोड़ी नेई। कोर्ट नै चिंता जाहिर कीती ऐ जे अगर कुसा बच्चे दी आवारा कुत्ते आसेआ हमला करने कन्नै मौत होई जंदी ऐ ते कौन जिम्मेवार होग। सुनवाई दरान वरिष्ठ वकील अरविंद दतार होरें आखेआ जे जानवरें दी जन्मदर कंट्रोल करने आस्तै मुखतौर पर नसबंदी कीती जंदी ऐ ते एहूदे कन्नै खूंखार कुत्तें दा मसला नेई सुलझदा गे हमले दा खतरा घट्ट हुंदा ऐ। वरिष्ठ वकील विकास सिंह होरें कोर्ट गी अपील कीती ऐ जे ओहू इसी मनुक्ख ते कुत्तें बश्कार मसला नेई बनाए तां जे पर्यावरण च संतुलन बने दा रवे। सुप्रीम कोर्ट च इस केस दी सुनवाई पिछले बरे दे जुलाई महीने थमां होआ'रदी ऐ।

<><><><><><>

German-Chancellor

जर्मनी दे चांसलर फ्रेडरिच मर्ज होर अज्ज बैंगलुरु पुज्जे। बड्डे ते दरम्याने दर्जे दे उद्योग सरबन्धी कर्नाटक दे मंत्री एम.बी पाटिल होरें दुए वरिश्ठ अधिकारिणं सने उंदा हवाई अड्डे पर स्वागत कीता। आई.टी शहर दे दौरे दरान मर्ज होर जर्मनी टेक मजूर बोश दे भारती मुख्यालय जांगन। ओहू भारत विज्ञान संस्थान दे नेनो साइंस ते इंजीनियरिंग केंद्र दा दौरा बी करंगन। इक सोशल मीडिया पोस्ट च मंत्री एम.बी पाटिल होरें आखेआ जे चांसलर मर्ज हुंदा बैंगलुरु दौरा जर्मनी कन्नै रिश्ते गी होर मजबूत करोग ते विकास, नमेंपन ते सांझेदारी दे धेइये गी नमा रूप देग।

<><><><><><>